

四庫全書

集部

欽定四庫全書

集部
橫塘集卷一至四

詳校官庶吉士臣張溥

侍讀臣孫球覆勘

謄錄監生臣單可姦

欽定四庫全書

集部四

提要

橫塘集二十卷

別集類三 宋

臣等謹案橫塘集二十卷宋許景衡撰景衡字少伊温州瑞安人登元祐九年進士宣和
中召為監察御史遷殿中侍御史欽宗即位
以左正言召累遷中書舍人高宗朝至尚書
右丞罷為資政殿大學士提舉洞霄宮卒謚

忠簡事蹟具宋史本傳景衡雖源出洛學而立身剛直不與賈易諸人囂爭門戶其文章亦坦白光明粹然一出於正在徽宗時即極言財力匱乏請罷花石綱運為王黼所中而去及從高宗在揚州又與黃潛善不協偕渡江之議斥逐而死雖阨於權倖屢起屢躓而終始不撓今集中所存奏議如論童貫悞國辨宗澤無過論王安中不當自便乞寬卹東南

諸劄子皆誠意懇摯剴切詳明其他亦多闕
係家國大計雖當時不能盡用其說而史稱
既沒之後高宗每念其遇事敢言追思不置
亦足見其忠愛之忱有以感孚於平素也至
其詩篇乃吐言清拔不露伉厲之氣如玉樽
浮蟻一樣白青眼與山相對橫諸句殊饒風
調胡仔漁隱叢話謂冠準詩含思淒婉富于
言情殊不類其為人今景衡亦然蓋詩本性

情義存此興固不必定為濂洛風雅之派而後謂之正人也宋史藝文志載橫塘集三十卷書錄解題亦同自明以來傳本久絕今從永樂大典中採掇裒綴以次排纂為二十卷朱子語錄嘗稱陳少陽事其詳見許右丞哀詞中今已不覩是篇則鉅製鴻裁佚者不少其幸而存者彌宜寶貴矣乾隆四十六年二月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

橫塘集卷一

宋 許景衡 撰

五言古詩

題海山亭懷左經臣詩

去年登斯亭江山照尊俎眼中十年舊一笑便爾汝今
年登斯亭春風糝花絮故人渺天末雲海滯鱗羽尺素
相濡沫耿耿不我與壁間指舊題珠玉暗塵土良辰豈
易得陳迹空處所眷言繼高韻寸縷慚織組嘉我二三

子肴挾佐玉醕歡然為傾倒落日爭起舞丈夫貴適意
窮達付出處洛陽真小兒顧慕涕如雨江流無日夜而
此獨不去何須數歲月俯仰亦今古

食筍

山中春物早霏紅亂桃杏霜筠固自如挺立萬夫整蟄
雷走狂鞭迸地驚脫穎鮮華競時節露籜含朝景山家
窘口腹擷摘盡畦町林間忽斑斑一笑脫愁境呼兒且
朝飯縹緲度雲嶺海犀紛縱橫荆玉燦光烟士生得所

適藜藿厚五鼎膏粱誰不飽去去多僥倖

康師見訪於竹閣因師臣師同賦問訊元老人
道人樂巖栖泉石厭眼耳胡為一葉舟汎汎西湖水應
憐老居士巾屨困塵滓相從一笑頃茗盃浮雲蘂江天
正搖落秋色淡如洗宴坐俯層軒稍雲森鳳尾眷言東
溪老挺立萬夫偉平生海潮音卷舌付諸子維此岑邃
師道學究終始當年幾酬對萬法一彈指要當出新句
特用問興止江河有餘潤今我亦隨喜

贈袁州仰山簡長老

簡師本吾儒學佛見閭奧開心滌塵滓回首棄巾帽飄
飄秋雲意凜凜霜柏操魚鼓屢陪衆林壑常寄傲十年
棲仰山終日勤勸導欲酌清泠泉為爾沃炎燥欲揮智
慧劍戒爾逞貪暴迷途自多梗法岸豈易到惟知務引
拔仰不愧覆幬幽明雖難詰善否疑有報巖間湧寶塔
茲事誰為造琢削寧須班挽拽誰困界一方競奔走萬
口盡譴噪守臣獻異狀天子錫嘉號鎮壓等衡嶽扶持

壯大寶師乎良有得叟也無復道

鄉會詩錢晉臣和韻謝之

流落湖海間十載苦卑濕生還亦何事猶未掃餘習天
葩發新句珠履追舊集和篇紛四來文采各熒熠轟鉉
金石動淒楚風雨急土風自難忘豈類南冠繫英英王
者後文武盛爵邑清深如古井短綆未易汲如何示同
好醉墨猶我及年來窮到底屋壁徒四立此行亦何幸
珠玉得屢挹騏驎委六轡萬里無險澀他年乘高車何

人猶戴笠

登清勝堂呈長兄

幽居在山腰斯堂近山頂松竹瑣陰翳軒窗闢光炯先生為題榜醉墨重九鼎登臨屬秋半搖落江山迴獨鳥點晴空斜陽亂帆影相將舉網去鳴榔盡漁艇含情寓毫端羞澁對清景却憶初來時積雪照高嶺餘香舞寒梅芳意萌野杏英英座中客玉樹凌風並天涯歎淪落誰使脫陷穽愴然撫陳迹曉夢驚初醒年來飽經事百

念欲灰冷君恩等山嶽此意猶耿耿何當伸報効萬一
免罪青杖屨時往來壺觴欲酩酊樊籠戢鴻鵠末俗多
蛙黷此心端不謬餘生亦何幸但恐主人瞋塵沙汙異
境

朱君文拉遊淨明寺因近張宰詩

火雲湧晴空矗矗盡奇巘午汗麾白雨俯仰無從適招
提據高岡萬木森偃蹇涼飈落冰雪爽籟發絲管朱侯
真好事十里過南坂憐我墮深甌相將振餘喘欄干俯

屈曲中屢容跣袒風苗翠浪翻海嶼青螺遠况茲接尊
酒笑語傾懷悵浮雲識醉歌彩羽驚檀板新涼知幾日
已覺秋風轉事業愧初心明時羞冗散主人勤使事睽
濶心不展雙鳬歸未歸紅日林梢晚

還自南邑潮過不及渡因宿江上書所見

漫刺辭主人遲遲駕短轅郭外人煙晚雞犬自啾喧客
事足俯仰世塗多險艱行役亦云勞未抵浪拘纏潮汐
真無情欽去如絕絃解衣試槃礴旅鴈方聯翩天末線

縷動鉦鼓俄闐闐稍看黃金盤吞吐洪濤間欻然洲渚
失浩蕩連雲天平生喜江海豈但眼界寬飄流二十載
齷齪百憂煎今夕復何夕玉壺俯人寰造物雖汝厄寧
不略汝憐清風一帆去鼓枻餘高眠佳處良在茲疇昔
勞永嘆

成正仲水鄉秋興寄王履道惠然見示以此謝
之

九河赴滄溟奔放日洶洶霖霖作秋潦散漫失邱壠孤

城臨絕島狂瀾驚四擁鳬鷗散凌亂蛟鰐似矜寵微茫
天勢平蕩搖坤軸動田家栽一麥秋稼泥沙壅何能憂
卒歲迫此朝夕恐孤生寄卑濕五斗安闌茸飽聞達人
觀未作窮途慟稍令裨危堤運土紛接踵河伯聊戲劇
爾輩嗟倥傯成侯北方秀筆力千鈞重新詩試模寫氣
奪洪濤湧英英幕下郎伉伉山西種何當一交鋒我亦
願助勇

龍華馬舖懷盧行之去年邂逅

去年南邑歸春風拂征轡相從一笑頃花卉方媚歲
月俯仰間還到經行地壁間舊詩句塵土日蒙閱老境
牽俗累節物搖鄉思歸歎悵何時與子同此味浮雲有
南北況乃為祿仕置之勿復論一醉了春事

道樂安寄楊縣丞時可

猗蘭出衆草歲晚不可採幽幽澗底松獨立色不改成
都有雲昆達識我所馭形骸判土木軒冕那能浼端懷
三釜養尚贊百里宰人方笑渠聾我獨悲衆賸經行間

闔里指述紛穉艾愛之不可見暮色生寒靄一區已有
宅三徑可無待他年歸去來垂白看戲綵林園日成趣
雞犬亦自在回看是非場蠻觸誰勝敗收身要閑健肯
坐老病悔我亦釣橫塘相望渺雲海

寄左四十

小左真竒才童穉已穎悟讀書一十年胷臆日充軀時
時吐所有落筆不肯住長江吞巨壑白日破昏霧雄辭
何縱橫妙理爭發露驂騑始汗血萬里猶頃步嗟嗟駑

駘輩安用苦猜妬而我何為者江海久飄寓得子稠人
中磊落真瑜璐文章豈易工識者尤難遇哀絃有三嘆
要非俗所諭往還幾歲月會面輒忘去蕭條抱膝吟浩
蕩登高賦迷途子所憐正我欲到處我觀古人文何曾
事章句至音本澹泊太羹異凡具君看桃李花紛紛競
春莫終焉適衆口了不在紅素子兮更深探吾言亦其
粗

寄左與言

時與家府
君遊天台

我公厭紛華早歲謝羈束卜居山水間山水長在目巉
巖吹臺高灩灩橫塘淥興來即杖屨往往混樵牧別來
二三載猿鶴悵幽獨歸心日搖搖夢繞湖山曲兒曹真
罪人志養非所欲留連州縣間折腰食斗粟世途苦多
礙公心亦煩蹙眷言慰公者蕭散惟林麓謝屐齒已蠟
陶巾酒初漉結東山家具提攜倩童僕遙知入山去野
飯久不肉相見石橋側觸眼驚寒瀑殷勤清淨供煮茗
媚乾竺璣底亦薄相聊以眩聾俗桃谿仙洞府流水花

翩翩二子去已久蟠桃知幾熟弔古一慨然新詩定相
屬英英太沖後壑壑崑山玉千言揮灑頃紙上龍蛇伏
聯鑣得所適山路忘重複我亦箇中人簿領方驅逐遙
望白雲飛此心尤踟躕美子好心事愧我祇眠餽人生
行樂耳險澀戒川陸千金不垂堂萬里虞脫軸歡罷念
歸旋無貪華頂宿

引泉示吳甥

淙淙玉溪泉曲折西亭隅飛流自噴薄白石淨如鋪雖

無漂井禽亦有針頭魚豈知江河寬噓沫自相濡況此
五六月萬物在洪鑪而我弄清淺瑣碎珠玉俱泉兮且
勿流止此為我娛一出澗谷去人間供百需清者鑒鬚
眉濁者混泥塗江湖尚或爾而况溝與渠寄語山中人
所養當何如

浮屠二首

浮屠有冲衍少小已雋偉身雖束異教性實嗜書史千
言揮灑頃妙語如翻水嗟嗟靜閣中斯人今已矣

成象有至行既冠逃浮圖與遊何其多一一士大夫毛
髮不及鬚破衲常如如軒檻已陳迹來者猶嗟吁

小圓石屏

微風激寒波浩浩皺紋縠連山夾修徑約略露寒木何
人琢山骨拂拭溫如玉蒼蒼碧月樣入手不盈掬此生
隨萬物何者斯為足要須指顧間一寄千里目

石屏

嗟我官永寧天台祇兼驛如何三過雁未省一投屐豈

無謫仙夢蕭散到泉石亦有山中詩淋漓堆醉墨當時
巧酬唱二左名藉藉戴子爾何為十載名山客自言石
橋下醉耳驚霹靂石橋富孫子一一粲珪壁希微小江
山妙盡丹青蹟憐我逸少徒念念岷峨適持此一拳許
已作千峯碧我生癡鈍殺兩眼眩白黑塵埃浪奔走簿
領隨戲劇何階探道要回首謝形役琴書載扁舟歸卧
橫塘側天台何必到去路饒荆棘端留石屏風種種自
可識

張仲共許惠呂研因成長句

英雄舊割據鼎業逐流水高臺亦已傾況及分香婢鱗
鱗屋上瓦棄擲滿隣里鐫窪漫兒戲後世始稱美世人
攻翰墨好古惟兩耳何曾問珉玉枉却千金市豈知疊
口翁十指老泥滓追蹤千載後未易較彼此其質堅而
剛其膚膩而理澄泓秋水淨慘淡暮山紫要當奴鳳唼
何止友龍尾神工付黃壤人間能有幾張侯金閨彥不
特河朔偉十年走澤潞百物盡糠粃惟有篋中珍左右

配書史明光惟起草此獨塵埃裏嗟我方著書瓦礫著
顚隨慇懃桂籍舊許輟陶泓子學問已遺俗取舍期不
詭及物何可望姦諛誅既死

南監還宅

野店飯童僕駐馬亦俄頃寒日不相貸漸漸歛西嶺揮
鞭上馬去驚塵蒙四境客衣已踈薄霜風作淒冷極目
去路長回首煙村暝鳥雀飛棲定雞犬啾喧靜新月當
馬頭踈林亂人影去去甘遠役遲遲復深省筋力疲往

來歲月磨簿領雖云竊廩祿乃是蹈機穽戰栗當吏案
低回傍公屏少年浪自重事業期台鼎棲棲裁一命泛
泛慙飄梗窮通宜有在賦予定誰秉矢詩寄幽嘆寂寞
寒夜永

庚子歲作

我本山中人中年墮紛華祠庭罷香火還尋舊生涯墟
曲分耆舊問勞仍咨嗟三徑日荒蕪歸來何晚耶亦既
謝父老低頭自吟哦人生各有役倦游即還家來者祇

如許往者知奈何

憶昨

憶昨秋風時持檄走東越棘園瑣深嚴蓮塘漾空闊嘉
與二三子雄辯探理窟清尊日從容高堂俯軒豁思家
資善謔望遠嚴詩律海蚌剖明瑩荆璞略玷缺雙瞳眩
丹青萬紙疊冰雪敢辭窮日力要使駕驥別誰憐今夜
裏還對中秋月當時席空堦清影數毛髮杯盤已零亂
浩歌彌激烈朋從渺湖海歲月苦飄忽窮閭撫往事驚

夢誰與說清砧送逸響寒蟬共幽咽舊遊知誰在想見
賓筵設冷然廣寒宮共此白銀闕題名滿四壁世路非
一轍北軒風雨多長恐銀鈎脫

白沙驛弔辛氏

劍溪激流湍狠石森戈及劍山皆壁立小徑千盤紆行
人雖慎擇何者為夷塗我行岳灘上短亭臨路隅詩榜
紛四壁共傷辛氏妹辛公罷會稽歸舟挈妻孥驚濤觸
巨石十掌一息殂唯公倚敝蓬脫命顛沛餘泥沙汙玉

質波瀾漾羅襦草木為慘淡鷗鳬亦驚呼
嬌魂逐流水散漫何所如遺骸不盡獲
亦有葬江魚千金不垂堂覆轍戒後車
爾死今四紀曾無復淪胥是身等浮雲
變滅只斯須在物苟有益寧辭死非辜
沉江恥讒國人皆笑三閭殺身以成仁
聖言良不誣溺死豈爾志庸知非良圖
紛紛殖已利感歎獨躊躇

和時可醇酎二首

聖賢須千鍾我豈箇中人焦枯展餘瀝
好我已十分元

戎鎮河朔憐此賤與貧不羨彼瀛州已有玉膏醇小槽
滴真珠霑餉無踈親但有坐上客誰問甌中塵豈學梁
父吟何時見陽春

勞生何擾擾百年今半塗是身等浮雲南北方自如青
衫憶初仕與公父子俱邂逅話疇昔恍恍一夢餘

潛清室

世途溷塵土道人獨潛清隱几方丈間凜然玉壺冰湖
山自拱揖風月時將迎未能役濟勝久客媿吾纓

書聽雨亭呈元老

無雨我掩耳有雨我不聞我豈妄人耶心手自紛紜
老人登斯亭聽否了不分前山忽震雷後山堆白雲

別毛德修

張公鎮關南賓客多僑偉芝蘭已秀發父子作知己
聖人樂育才克庭皆濟濟仲也與計偕發軔已千里
毛侯東南特清澈分潑水並驅及春風聯璧驚都市
麟鳳豈無種貂蟬能有幾承家貴勲業可獨在書史
自憐坐櫟

散所學輒簣止永懷勝已遊塵土濯清泚相從苦匆促
寫別亦狂斐離庭寒日暮目斷塵沙起

欽定四庫全書

橫塘集卷二

宋 許景衡 撰

五言古詩

贈人

山陽隱君子少有高世名
終身慕父母事之如平生
青衫老一命儒宮談六經
經行必造門懷如遇公卿
虛往而實返授業多豪英
衣冠塵土闇辯論江河傾
吟哦千萬篇迴與六藝并
鮑謝寒蟬噪郊島蒼蠅聲
先生兼衆

體渾然獨天成

贈朱深明

十年走南北委跡甘蠹蠹舊學已茫然踈慵長自哂豈
知江漢旁名士有標準高名久傾屬王事得親近可是
臭味同一笑脫畦畛華堂照屏玉覺我蝸舍窘風流跂
前輩要當攄妙蘊胡為飯藜藿默坐師粲忍微生縻簿
領與俗益矛盾蹉跎谷口志慚愧鹿門隱百念已灰冷
積習掃未盡緒餘君勿靳速途須汲引

次韻江民表寄王聖時六首

先生脫塵屣西室八十年物態日紛紜此境長湛然問
道滿函丈孰云無世緣茫茫天地間所樂乃一廛燕坐
亦何為柏子炷爐煙

前輩不可見吾猶及此老洒然忘鄙吝豈復嘆枯槁微
言破聾聵從之恨不早況有樗櫟年底幾松栢操先生
為首肯人人有吾道

我亦斯人徒鳥獸可同羣隱居豈我意短褐老海門物

理有悟會明鏡無塵痕似聞釣臺老勸飽千里萼宣為
飲啜興端念父子親

諫省坐何事南遷臨嶺嶠天命已在我誰能賦鵬鳥第
懷平生友坐隔湖海杳生還桐水上尺素寓襟抱鷄黍
儻可期千載有同調

居士不溷俗已判此生間釣臺經世志諤諤在朝端出
處固不同相對即歡顏乖違限南北奮迅無羽翰此心
日相見未應勞永嘆

天地吾一氣萬物吾一身紛紛梏形體末學蔽多聞二
老獨超然早以德為鄰昭昭此心理千古無故新寄聲
發妙蘊一視世間人

次韻王經國

人生皆有役我亦事川塗崎嶇蕩兀中此境常晏如永
懷賢令尹出處與道俱起予亦多矣詩句乃其餘

次韻鄭希仲

周詩三百篇強半出憤激少陵嗣真作千載無匹敵嗟

我亦何為苦心等蓮萼平時一千首棄擲隨瓦礫朝隤
不成雨安用橫天霓吾僚一何妙筆下飛霹靂青天與
白日奴隸皆知覲况是箇中人固應厭飢怒入幕盛紅
蓮不才慚散櫟勉哉攄婉畫稚弱安紡績

次韻姚伯遇

從事慚非才日覺有不如丐閒得祠館回首謝榮途古
來陋巷人飲水樂有餘利勢與名節二者常難俱

無題

功名等戲劇俗眼自驚詫詩酒有真味多應知者寡嘗
聞歐陽子風月本無價今我貧到骨懸磬比居舍就使
一錢直在我已不暇故知造化意特用相慰藉

李伯時畫陶淵明其猶子遺余作此謝之

斯人今何在古冢號寒木簡編漫遺言風采不可復龍
眠真偉人千載識高躅神交入心匠醉墨爛盈幅蕭然
出塵意豈獨舊眉目仲容還好事收拾珍筍積世人渾
未見惠然投我欲乘田元不恥折腰亦何辱行藏固有

在今昔豈余獨新詩第甲乙三徑森松菊少陵曾未知
浪疑公避俗我生癡鈍殺野性等麋鹿長恐探道淺輕
比抵鵲玉人生適意耳何苦自羈束低頭拜公像塵土
方碌碌

過新息

新息臨通衢赤白紛棟宇古息渺村墟相望十里許我
行屬馳驛枉道不可去弔古獨踟蹰指以示田父傷哉
彼美人國破為隸圉驚魂懍風葉暗泣泣花露一死重

太山亦或輕一羽猶能子元辯獨爾悄無語舊物空顏
垣草木日繁蕪悠悠清淮水千古亦東注

東郊

東郊過新雨野色何氤氲嘉苗起萎病萬頃堆寒雲田
父揖行客苦訴村墟貧年年夏旱時赤地流黃塵小兒
困鋤耘烈日背欲皴大兒斡水車手足無完筋官租且
不供矧欲養吾身東隣久無煙幾口能生存西隣逐熟
去今作何鄉人行客謝老農艱難困勞塵而今新官家

寬大布深仁大臣亦端良乘時轉鴻鈞汝豈不自覺新
歲雨澤勻寰區日寧靖百物方訢訢爾曹死亦足及為
太平民

次韻酬胡元賓

天地一逆旅此行適同塗等是驅馳人何者為不如一
念有忻厭慊然顧羸餘安得如吾子不與世俗俱

和楊時可贈吳子厚

吳子守西河彊敵能遠遁功名豈不偉事親有遺恨雲

孫亦何為總髮能自奮論兵得家法絕域屢得雋三釜
乃吾志九遷何足論一朝棄官去悍卒亦驚歎官長欲
挽留歸塗已強半皇天照忠孝爵祿亦如願彼師乃曾
子棄絕等仇怨子從何人遊卓爾有獨見父子今一處
甘旨應手辦垂垂對黃髮行行日歡宴客來為從容觴
豆無早晏古今入商畧亦有一笑粲人皆贈渠詩素壁
供揮翰吾丞豈直聾尚缺此一段君親恩彌重報効不
可緩始終能自勉高義薄雲漢

冬至日雪

烈風鼓青冥陰雲布崢嶸不待珠霰集忽驚玉花傾一
陽動黃宮萬物如有萌豐年頌上瑞我獨欣發生永夜
不能寐耿耿書窗明

仲煥雪中見過因留小酌

陽復日雖長歲暮氣猶慘馬曹磨管庫兀坐長戰顙豈
無紅鑪炭欲取終不敢亦有兵厨酒隻指弗容染蹉跎
為祿仕黽勉從吏檢晨趨析毫分暮色俄黯黯天公復

街巧六出紛如糝自慚非安道誰肯泛清剡慙懃絳帳
客竹輿甘頓撼可是乘興來正坐憐穠坎駝褐點白玉
烏帽從風颭長衢得迴駕寒光照肝膽濕薪噓白煙孤
燈裊紅燄荒齋聊一笑俗境洗瑕纇江梅寫春意粉面
誰粧點疎影落清尊勸人傾漱灑念君齊魯秀文字垂
琬琰俛首江漢間為人作模範府中多豪雋淥水浮菰
蓄珍烹窮水陸何獨嗜昌歎仁聖今在御威柄方親攬
君看盈尺瑞端自天心感太平容冗散萬一逃汰貶追

隨有餘日相與樂閑淡人生隨所遇何者為夷險要當
反自味豈特嘗橄欖

去年冬至過閩清再至有感

憶昨初寓宿黃宮萌一陽今我復來思節物老春光濃
陰付梅杏青實久已嘗翳翳軒窗日幾線如許長蜂兒
飽儲蜜燕子已巢梁吏役祇擾擾何術補民瘡學古要
施設及時當自強光陰俯仰過老矣徒慨慷挺挺彼蒼
官生來傲氷霜端然閱榮謝未覺歲月忙

七言古詩

和王魯公掌中太華

五嶽獨說太華雄屹礫千仞撐青穹何人收卷入掌握
要使肉眼驚神通懸巖絕壑濺飛瀑玉牕翠壁開深宮
先生捧玩豈徒爾崇卑真妄歸圓融我生江海曾未識
幽邃崎嶇煩指蹤堪笑騎驢老潘閭却要三峯在眼中
次韻楊時可戲高潛翁

青衫白馬佳公子山東豪俊知名氏平生青雲期自至

倉庾一官聊復爾丞公家風繼伯起笑渠颺糠兩眼眯
乘田委吏古不恥端恐前言戲之耳

送僧之石梁

萬卉流芳不知春力巖畔澗下蹙紅皺碧乘興復誰同
孤蹤遠讎敵君不見五百聖者道雄機靈峰晦盲深無
極寒山老寒山老隨沉迹迢迢此去須尋覓花落花開
獨望時記取白雲抱幽石

江邊行

江邊煮鹽女日墾沙中土聞道潮乾土有花肩負爭先
汗如雨經年鬻鹽赴官市屋裏藜羹淡如水誰家滋味
盡八珍猫狗食餘隨帚塵

和長門怨

長門沉沉人悄悄滿庭紅葉驚秋早窻底銀釭祇自明
却聞別院按歌聲飛花滿地君恩去覆水返瓶君或悟
人生離合自有時多應不在相如賦

調同舍

播穀子播穀子爾休苦苦催春耕勸農使者無一語嗟
爾聒聒知誰聽提葫蘆提葫蘆荒年有酒無人酤先生
年來亦不飲花前愧爾情渠渠杜鵑流血思歸去百舌
從來巧言語紛紛隨意作春聲夢入釣天聽韶濩先生
避俗厭煩喧竹底誅茆嘗閉戶蒼苔滿徑人迹稀嗟子
胡為肯同住聲名盡道男子事窻下誰知讀書苦燈花
落也作罷休早取商量君聽取

故人惠馬生筆

聞說江南多筆工馬生所作尤瓌異十年江海得妙音
一日聲名傾衆技故人憐我有書癖數管不辭千里寄
齊鋒出穎雖不殊灑墨虛心皆已智當年退之傳毛穎
假辭託說終傷僞我今草草又百載矯首相望空兩地
文房四子迭有無商沒參橫似相避鼠須栗尾乃見嫌
強欲用之隨棄置馬筆端如故人面眼瞥見時心已記
跳龍卧虎非世習縮蛇縈蚓皆兒戲豈知遠適在加鞭
却做良工先利器何當拂衣隱林麓約史著書從素志

敢言名姓垂竹帛自甘生死惟文字敬謝故人因及馬
梳毫截管惟精緻而今勁健已不售要須軟熟隨人意

靜堂為弼上人題

浮屠西來如轉郵方袍紛紛劇東甌上人維弼志獨優
翛然高舉異凡儔從師度淮沂隋溝神都歲月俄十周
燕坐縹緲雲中樓明窗翰墨永繭柔貴人旁午擁軒騎
問汝亦有所欲不此身南北真浮浮黃金白璧誰能收
乃獨汲汲從英遊乞書覽字無時休千年金石窮雕鏤

上劇鍾王下虞歐模糊墨本如山邱精神散漫不可求
俗人貴耳賤兩眸今人古意豈不侔森然玉筋垂銀鈎
怒貌渴驥蟠靈湫錦囊象軸光油油自笑長物猶見留
幡然忽憶江湖秋瓶錫東下如輕鷗誅茆伐木寒巖陬
名堂以靜益有由坐觀蠢蠢遍九州長空浮雲水中漚
眼前何曾無應酬嵐光波影相夷猶別來書札屢相投
問我何時泛扁舟西峯玉泉深且幽杖藜來往亦風流
紅塵道路方悠悠回首東南天盡頭

渡淮

我觀淮之源東行已千里扁舟一日下長淮似與故人
相見喜不知渡越幾澗谷清澈尚爾無泥滓澹然端肯
與我俱試問故人能有幾蕩雲沃日窮眼界茫茫直與
天相似萬艘絡繹鼓風蒲翳翳塵飛明鏡裏況聞水伯
時惡劇雷擊風掀浪山起豈知生處極幽深清淺湓湓
一泓爾吾聞古來養心者擴而克之亦如此自慚學問
太迂踈十載不離蛙井底潢汙斷港何足道所得未能

充口耳忽驚浩浩東傾海會令百川皆遶指君看厚地
一撮土本來也是無多子人間萬事須自強嗟我蹉跎
今老矣

和左與言謝寄酒

君不見梅子真當年狂歌吳市門神仙隱逸兩何有耿
介感激空千言我今幸生太平日千載相望同祿秩閒
看世事渾不知一心祇願饑腸實有誰解與魯公米無
田也釀淵明秫甕間細酌新潑醅既醉歡娛亦蕭瑟江

湖誰肯便相望一尊猶及詩人嘗榴花竹葉應撥去落
殘且看鵝兒黃高齋肆筵盡嘉客長鯨一吸無餘瀝座
上杯盤未狼藉愁見長瓶卧東壁新詩飄飄寫骨髓青
天白日飛霹靂休言李杜門限窄到底輸我巧鑽刺我
詩衫鷄竹兔耳未見虎狼先辟易異時更敢說較量縮
手從今作降敵

謝韓用可和記夢詩

嘗聞歐陽子自許一世豪及得梅老蟠桃詩畏彼松栢

臨蓬蒿歎然欲以怪自戲新句遠繼愈與郊嗟我後來
亦何為敬誦遺墨徒嘈嘈有時援筆學模寫矯首但覺
嵩衡高宣城無人頽尾空百年風月何寥寥那知吏部
有孫子年少力學精風騷前日記夢屬我韻筆墨奔放
欲與二子爭秋毫秦盆楚筑未覺陋鏘然入耳驚咸韶
昔我一官向天台春風洞府生碧桃簡書坐束寸步不
能到落花流水空迢迢羨君幽夢得所適一飽便覺忘
葷臊要尋蘇后評濟漯宜學劉阮迷妖嬈百年擾擾亦

夢耳更較長短論昏朝不如吟詩飲美酒從他世事如
牛毛

按田南鄉夜過翁嶺

斗祿折腰方自勉敢嘆塵沙長滿眼平田細路苦縈紆
盡日肩輿在香篆簿書告辦裁知返落日在山山路遠
荆榛蔽塞虎縱橫僮僕相呼無處避山下人家早閉門
踈籬燈火自黃昏杯盤四座還相語猶有行人過別村

贈五台妙空師

山僧棲在山之巔胡為振錫來市廛且言自得相形術
願與多士談媼妍津塗窮通可逆數名分巨細潛開先
龐眉合享壽考福鼎角堪持丞弼權人生肖貌雖若爾
天理應效非皆然條侯餓死始難必裴度果相終何緣
亨衢第以直道致吉祉多為陰功延操脩向善或向惡
感召凶吉如蹄筌予觀傳記考物理謂師語議非無傳
出言少偷信不免受玉荀墮知難全況乎素行未中積
敢以虛表要諸天富哉荀卿騁雄辯推本心術深磨研

九州功崇夏禹跳三面德至成湯偏仲尼何長子弓短
古今無害為聖賢林宗知人出明性清澈鑒裁猶澄淵
大端亦貴器與識規矩安可私方圓君平卜筮達至理
探索造化窮推遷與臣言忠子言孝利害之際尤拳拳
古人術學務原本寧將浮說相拘攣美師通論近名教
為師條列終吾篇

康師贈臣閣黎次韻

樂天西湖誇竹閣寂寞百年風隕籜師今燕坐最勝處

條然日誦山中樂富貴易致閒難得造物畀渠良不薄
老康游戲作偈言使我怡悵心茫然

趙持志出先公文炳所藏蘆鴈

當年公子身通侯錦衣玉食天上游騎龍日日朝北斗
豈識萬里江湖秋但聞人說蘆葦傍枯荷翻倒風颼颼
四天墨黑雪欲落羣鴈上下聲咿叻坐嗟上界足官府
十年高閣空雙眸豈無詩句強模寫曉夢不到寒江頭
何人筆墨得能巧活脫所見來神州高堂素壁試披拂

已覺身在蘆花洲嗟嗟江海人兀兀一葉舟煙蓑雨笠
不自好風雪橫來翻百憂豈知公子曾未見鱸素髣髴
千金酬人生萬事適意耳過眼起滅皆浮漚王丞置壁
誇謹密流落道路知誰收公子好畫豈云爾要使萬物
供冥搜至今好句在人口泰華哭兀黃河流嗟我後來
亦作詩辭慳意鄙勞雕鏤願起公子已死中論詩觀畫
一洗千古愁

欽定四庫全書

橫塘集卷三

宋 許景衡 撰

五言律詩

張元光生日

濶步雲霄去當年屬意深感時雖白髮許國尚丹心顧
我無才思登門怯醉吟誰能將壽酒滿滿為公斟

寄欽師

亭障臨燕塞江山復楚鄉艱難悲客路宴坐憶禪房燒

盡蒲花燭清餘栢木香十年如夢覺兩鬢自蒼蒼

還自肅寧晚色可愛寄盧行之

送客關城外回鞭驛路長風煙無限好簿領底能忙平
野破寒木紅塵烘夕陽新詩巧模寫最憶幕中郎

信步

信步春風遠田家暮景遲亂畦還有徑疎竹自成籬雞
犬皆豐歲漁樵獨此時年年看節物鬢髮欲絲垂

招隱堂

僧家樂幽獨世路自塵埃
丈室何人到重門盡日開
石泓泉滴瀝竹徑月徘徊
多謝相招意江湖歸去來

次韻彥崇遊三洞

兩溪尋勝處三洞得偕行
澗外雲猶濕山深谷應聲
留連看龍躍來往計牛鳴
回首林間寺踈鐘報晚晴

送翁修撰

天上曾三接人間第一流
雲章頒召節錦里送行舟
急雨千山暮迴風五月秋
紅旗猶可識賓吏滿江頭

端午

節序重重過京華物物新安排
黍生角粧點艾為神窮
街無來客他鄉有故人揮毫非楚些誰與弔靈均

九日

青女飛霜重黃花挹露鮮
伊人今已矣節物獨依然
撫事真疑夢登高淚迸泉
關河重回首煙草夕陽天

九日追懷叔父兄長登高

殊方復嘉節對酒重悲嗟
逝水人何處荒籬菊自花
南

樓秋色遠西嶺夕陽斜舊日登高處于今定幾家

送黃元賓還鄉

寄語黃夫子而今正好行麥秋最涼冷梅雨半陰晴客
路空形役鄉山獨眼明偏親應更喜少婦好家聲

送世厚還鄉

斷續黃梅雨清涼小麥秋謫官猶逆旅送汝上歸舟松
菊宜勤種簞瓢善自謀餘生須付託可但鹿門遊

過西岑泛湖而歸呈左經臣

留連不覺久蕭寺足清風短棹平湖裏孤城落照中朝
廷尚多難身世轉飄蓬安得言分散清尊宜易同

呈呂幾仲

曾作河陽客春來花滿城曉風吹玉勒殘月落金觥天
末傷離索京華忽會并琵琶雙鳳翅耳冷十年聲

別黃巖

問我黃山尉無才亦可知頻修謝罪啟祇作送人詩壠
畝豐登外山林冠盜衰曾無慰父老別後莫相思

奉酬胡文贈別

蹇淺時何取，蹉跎歲又陰。
田園歸去計，事業老來心。
好句煩相屬，離愁自不禁。
松江分手處，煙水暮沉沉。

春晚

行樂連三月，漁樵亦醉吟。
桑麻須日力，花絮識春深。
飄泊驚時變，文章信陸沉。
故園渺天末，無限欲歸心。

和經臣晚春

蝶散花猶在，鴝藏柳已陰。
敢辭連日醉，恐負惜春心。
金

縷休頻唱瑤賤正苦吟獨慙詩學淺三嘆豈知音

伯氏

伯氏古豪士何曾與俗同酒狂天地外詩句笑談中池
水添新綠林花看舊紅向來多樂事天末任漂蓬

早渡浙江

官舟憐逐客鳴榔破驚湍霞氣橫江白秋風送曉寒平
生獨往願今日上恩寬漸近嚴家瀨擡頭覓釣竿

晚行

脉脉多愁思，栖栖復晚行。
路回村更遠，林邃客頻驚。
宿鳥非無處，歸雲自有情。
鄉關悵何許，天際暮山橫。

松門詩

竹轎兼程去，松門百里餘。
荒林疑獸伏，窮海異人居。
山擁波濤急，沙輕步履虛。
來因王事耳，此外敢躊躇。

送從姪邦直丞長溪

阮舍淹丞屬，閩山得雋髦。
詩書能自立，州縣豈徒勞。
迂拙從吾老，飛騰看爾曹。
祇應記岑寂，尺素到江臯。

示世隆

問訊吾家姪題詩寄此情遺孤猶小在聰慧乞憐生祖
母今年老門風待汝成須知踈懶叔早晚欲歸耕

吹臺

聞說吹臺上秋來鎖薜蘿白雲長自在幽徑復誰過天
末空愁眼尊前且浩歌山林與廊廟二者竟如何

種樹

幽谷青青樹移根倩爾栽祇疑荆棘地不稱棟梁材豈

為歲寒改稍看春色回清陰惟海國回首思悠哉

翁行簡挽詩

學舍賢師友年家老弟兄分符渺淮楚傾蓋憶都城白
雪千篇在黃梁一夢驚承家今有子未覺負平生

趙敦禮見招小飲投壺明日南去

瀟灑賢公子閒邀病客俱青燈初照席彩箭已盈壺隆
準真龍種清聲想鳳雛扁舟明發處應記夢華胥

挽劉太君詩二首

婉婉宜家早孳孳執禮勤事姑俱白髮看子上青雲飛
旒隋河路新阡慎水漬哀榮兩殊絕州里未前聞

配德樂邱園承家屬後昆千鍾豈榮耀一笑為平反庭
樹悲風慘霜天落月昏斑衣已陳迹補袞看忠言

次經臣見寄之韻

召節來金闕扁舟望石門家山秋渺渺煙水暮昏昏竟
失臨分語徒傷遠別寬慙懃謝池月相對宿江村

次韻周共叔五首

問學探前聖聲名自妙年何疑待價王却計買山錢北
極雲垂地西江水接天扁舟如有約吾亦賦歸田

黃卷開三館紅塵又幾年病多須藥物旅寓費囊錢舊
學寧無意斯文祇任天軒軒千里鶴可但戲芝田

鄉國兵戈息仍聞大有年欲尋江上宅預辦酒家錢好
句煩招隱餘生且樂天向來真可笑舍已別耘田

賜環初就日弛擔又逾年老矣懷三徑歸歟有幾錢報
君慚犬馬戀闕望雲天但得鄰顏巷寧論負郭田

鄰並端如約追隨可判年稻梁當富歲魚蟹不論錢春
到花開處霜餘橘熟天清尊長嘯傲滄海半桑田

次韻王功達見寄

烏府參風憲鰈生負德音投閒雖白首體國尚丹心天
上浮雲散江邊秋色深第知歌擊壤寧復賦愁霖

次韻陳仲山見寄

風雨江湖夢衣裳京洛塵人生皆物役海內豈吾貧丈
室雖多病鄰翁或可親杖藜元有約會見往來頻

次韻似之運使奉呈左經臣兄二首

江海閒來久篇章老更新蒿萊猶自飽天地豈吾貧舊
友今持節諸郎亦可人應憐未歸客白首尚紅塵
酒膽他年大詩名近世無山林多避寇里巷笑為儒老
去慵開眼秋來欲染鬚涼風千萬里的為南圖

寄許樂清冲輔

入竹空陳迹經行憶歲除舊遊誰更在逸興近何如樹
密鶯聲遠江寒鴈影疎樓頭紅日晚徙倚獨躊躇

曾汝器既別奉寄

憶在西齋日斯文得細論別離空歲月飄泊任乾坤把

酒餘風味看雲各淚痕扁舟獨歸處煙水暮昏昏

余與汝器

皆有哭弟之戚

寄張德祥

細草碧侵池幽花亦滿枝羣生俱有德造物定誰私故國春將暮他鄉日自遲論文一樽酒何路得追隨

寄竹閣匡師

鹿苑西湖上烏臺北斗旁塵沙空自老雲外定相望林
麓餘秋色郊原半夕陽惟應閣前竹凜凜帶新霜

寄沈亨老

時在京師

京國三千里人來慰所思遙知為客好何似在家時春
日鸞鳳去秋風鴻鴈悲衣裳慈母線亦恐汝歸遲

寄薛十七巨源

茅屋西山曲攜書喜見過別離驚歲月淹泊奈時何末
俗皆浮誕斯文肯琢磨後生餘力在吾意已蹉跎

寄錢子勉

花縣逢迎日琴堂宴坐頻
簿書時有暇燈火夜相親
世系皆王澤官曹獨海濱
政成飛鳥去念別一傷神

寄題張學士三徑堂二首

留侯有高致世業更誰傳
苔雪新開徑蓬瀛舊集仙
藜床蔭松桂蕙帳帶雲煙
擾擾爭毫末何人解樂全
我欲尋三徑長歌歸去來
未能似夫子還是走塵埃
彩筆臨流賦清樽對菊開
披榛往來處東望思悠哉

縱目軒詩

真人已仙去釋子在高峰暮色江山遠春風草木深何
人與題詠今我亦登臨縱目皆云爾誰知有縱心

行役詩

行役無時節春來又幾時柳條隨處處梅蘂亦枝枝弱
質曾無取斯文祇自宜眼邊新物色駐馬暮江湄

石泉小軒

泉裂碧巖腹茲焉復小渠泓澄元有在漑濯乃其餘孤

迹寄江海三年困簿書閒來俯清淺感歎獨踟躕

土山驛詩

在永靜軍界
時被檄濱州

渺渺指滄海行行過漢陵衣裳千里雪鞍馬九河水寓
宿適有處悲歌自不勝平生少游語耿耿對寒燈

晚晴

南州苦卑濕梅熟復何如老夫厭巾屨穉子在泥塗新
月出天末微涼生雨餘陶公入州府此興與誰俱

天街經暑雨烏府絕塵氛躍馬人皆散新蟬我獨聞風

生初罷扇日轉漸無雲寄語同時客清涼尚可分

駐馬詩

駐馬長河曲穿林小徑斜猶能尋隱逸可是厭泥沙
軒冕雖無意田園尚有涯何時策筇竹隨意到山家

無題

台奴初學語丹子已能行問叔今何處嗔爺太懶生
會令主門戶豈復意功名坐對江湖晚橫塘舟自橫

野外

野外連荒草樓頭正夕陽
凭欄空遠目何處是吾鄉
王粲從軍樂少陵羈旅傷
男兒知底事出處兩難忘

宿僧房

捕逐雖王事經行亦自強
艤舟當海島寓宿得僧房
絕境三山在清風一水長
此生空物役回首意茫茫

夜過杜家村

駐馬問村老却言行未遲
路雖十里遠月到四更時
我
去良有役子眠寧負期
人生隨意好冷笑一題詩

送師顏致康深道入京

二子今西去贈言聊爾規
勉哉精素業行矣仕明時
破臘梅先藥含春柳欲絲
江邊人散後帆影漸參差

上章倅二首

海內名聞久江邊歲復暮
美才由世濟清節畏人知
郡國已無事朝廷方有為
會衆鴻鴈序歸去鳳凰池
簿領勤官府聲名振士林
雖云心尚在自覺力難任
歲月淹多病江山入苦吟
高堂昔三嘆亦恐負知音

遠意

遠意誠難問狂歌自不禁
花光春灼灼月色夜沉沉
簡冊終何事江湖獨此心
野禽多意緒飛集近寒林

橫塘

好在橫塘水人今去幾年
秋光空到地霽色自連天
伐石圍高岸誅茅駕短椽
歸歟此心在何苦利名牽

節物詩

江水西風急江天作暝陰
鄉山猶在眼節物莫驚心
是

處皆秋穫誰家急暮砧薄遊愧妻子飄蕩到而今

聞子瞻南遷

隴蜀崎嶇外炎荒聞望中黑頭方世用青眼忽途窮遂作天涯客何如塞上翁幽愁還有作笑殺贊皇公

賀人祖父生辰

青春嘉誕日八十渭川師林下有真樂人間無愧辭松梢看舞鶴荷葉隱巢龜賴有榮孫子藍袍薦壽卮

贈吳子思

花縣初相見清樽日笑歌交情論厚薄客路自蹉跎歷
歷功名意駸駸歲月多豈知同夜宿還問命如何

贈姚儀甫

年少開千卷生涯祇一瓢聲名動場屋意氣在雲霄素
髮今垂領青衫尚折腰未應輕斗祿吏隱本逍遙

贈張承老

永裕躬神武開邊絕漢西雖云擁貔貅猶未斬鯨鯢吾
子名家後當年訓士齊天涯思往事回首祇悽悽

題壽聖院

古寺重門裏回廊一徑幽水聲長帶雨山色最宜秋
宿已多日題詩更少留此生隨利祿行路日悠悠

寄題葉希聖申申亭

燕處厭紛華穿林一徑斜層巒開水墨古木走龍蛇
事業雖無補田園尚有涯何時策筇竹隨意到山家
每向新亭去何曾問主人弟兄俱有好樽俎自相親
棲翼雲山晚飛花洞府春長愁醉歸去步步近紅塵

孫大夫絕塵亭詩

丈人樂高曠閱世等樊籠
池館重城外塵沙一笑空
紅蕖新過雨修竹自生風
未必全違俗杯盤與客同

池上

十里西城去春風水拍堤
畫船簾幕動別殿簾絃齊
勿覺仙山遠相將醉路迷
紅塵競回首斜日杏花西

螢

不知何處出牢落水村邊
隱隱猶含雨飛飛欲近船
詩

書看老矣事業尚茫然今夕知何夕蓬窗猶未眠

去國

詩書元有志耕養苦無田去國何為者題詩獨慨然廟
堂修政事郡國奏豐年五斗雖云薄餘生得醉眠

升之兄見訪竹閣

飛蓋山城外尋幽鹿苑中層軒不受暑修竹自生風江
海多年別杯盤一笑同平湖吞晚照歸棹惜匆匆

寄題會文閣

劉子天台去君今幾代孫山居多水石客至亦琴樽簿
領嗟淹泊詩書失討論何當謝羈束杖策過層軒

亞叟惠臘粥次韻

飛瑄迎長後香糜入臘新交情最憐客節物獨驚人雲
意安排雪梅香告報春病中踈酒琰兀坐惜芳辰

再和

河南聞譽久漢上定交新遺粥聊從俗題詩更可人歸
期恨不早旅思怯逢春他日從誰餉長懷臘八辰

邱隱夫傳神

曹霸逢佳士，慙慙為寫真。
今君仍妙筆，顧我獨何人。
軒冕曾無意，功名敢問津。
會須添杖屨，却作自由身。

挽左司江公

前輩風流遠，惟公尚復存。
此心無限量，所得有淵源。
眷獎深宸展，聲名重諫垣。
平生經世志，已矣復何言。

壯歲從澹泊，猶餘味道心。
今朝嘆流落，羈旅老侵尋。
庾嶺暮雲合，釣臺秋水深。
向來遊歷處，千載只如今。

憲府叨新渥京華會卜居迂踈慙瑣瑣許與獨渠渠
唱看遺墨漂零送轎車他年桐水上雪涕更躊躇

樓朝議挽辭

金閨早通籍銀兔屢分符文采傾簪笏謳謠足袴襦
聯榮看子舍從養亦神都八十終天祿朋儕更有無
東南獨耆德湖海老門生未厭遺簪舊頻煩倒屣迎
容忽寘漠歲月又崢嶸夢入鄞江路依稀晚柝聲

送吳師常

吳君久羈旅所至即為家傾倒賢人酒浮游仙客槎此
身惟願健萬事儘從他聞說今歸矣田園亦有涯

送蕭德宏

孤嶼何時別雙溪累月留父兄安契濶庠序得優游宿
霧散初日春風乘去舟好看清汴水渺渺帶伊流

送李季成

花入新年好傳觴日倚欄故人從此別春色更誰看灑
落餘篇翰芬芳識惠蘭片帆天際晚回首獨江干

送李忠彥

留滯嗟爲客而今始據鞍
梅花春信早星斗夜堂寒
此別十分飲何時一笑歡
勞生強半在見晚不須歎

送德祥四首

借杜子美首句

天上張公子河間善最多
三年種桃李萬室自絃歌
北關今歸去斯民奈別何
會將清禁月千里照嘉禾

縣之西堂

天上張公子同時桂籍人
江湖嗟迹遠關塞獨情親
鴻鵠寧無志驂騑已絕塵
音書憐舊好別後莫辭頻

好去張公子依然別後深霜清風槭槭野曠馬駸駸
世皆榮問連枝復好音青雲多意緒寧復故人心

好去張公子離歌盡一尊朝廷方北顧父老惜南轅
御侮從先志招攜亦舊恩君對宣室為我折羣言

挽元僧正

物外孤高客人間九十春朋遊多有道學子略成塵
仙嶺浮雲散寒潭夜月新孤生長感愴先友更何人

景城雜詩六首

井邑遺孤壘漁樵尚幾家
洪河散陵谷古塚入桑麻
燕子初經節蜂兒幾報衙
此身天地內隨處是生涯

故國豈不好卑官良為貧
驅馳萬里去憔悴九河濱
亂水纔通野幽花已繡春
天公渾不惜乞與作詩人

藜藿晨昏外詩書寤寐間
百年皆物役五斗愧身閒
暖日花爭發春風鴈欲還
杖藜俯清淺蕭颯鬢毛斑

誰道邊城遠春風也自來
咿啞林鳥轉細碎野花開
日壓初晨霧龍驚昨夜雷
郊原閒駐馬極目絕纖埃

燕趙當南北關河獨鬱盤時平無戾氣歲閏有春寒仰
祿家千里題詩思萬端危樓多晚照倚徧小欄干
冰雪初消凍關河已見春民居樂豐歲吏隱是閒人黃
水魚偏美青帘酒亦醇吾生如有計五斗未為貧

任夫人挽詞

宋國保母

榮養方南國安輿更北轅從容對孫子聞問及平反無
復承顏樂猶餘在耳言會看墳上栢千尺倚高原

寄兄長

江上分攜日樽前聽我歌安居是非少游宦別離多陋
巷從顏子斯文續孟軻平生端有意嘆息自蹉跎

寄三十九兄

伊昔初分袂于今幾度秋鴈行慙北闕鴈序憶南洲湖
海誰招隱塵沙獨倦游平生一樽酒好在謝公樓

次韻兄長見示二首

拜命辭南國攜孥客上京塵沙驚老眼江海夢歸程醜
酒誰思我看雲賴有兄遙知倚欄嘯天濶暮潮平

此境本無塵端居更可人林園稍成趣風月轉相親暇
日已卜築他年待乞身絕勝貪夢好臨老種松筠

翁老過邑

百里絃歌地別來俄至今江山已陳迹桃李漫餘陰白
髮心猶壯清歌酒屢斟何妨鎮還往眷眷吏民心

酬盧行之

綠分冰片碎金拂柳絲長臘雪猶含凍春風何太忙會
看鷺出谷不羨鴈隨陽誰憶江梅發風流八米郎

次陳留

短褐驅羸馬依然寒氣侵春風官柳細紅日雪泥深
鵲多佳氣飛飛亦好音寧辭去家遠魏闕舊馳心

歎其大理墳

丹筆持平久清時屬望深誰憐一坏土長負百年心
舊友多高誼諸郎亦好音獨慚門下客流落但悲吟

姨母薛夫人挽詞

不獨相君子仍聞教子功安輿四方外色養百年中
隴

畝唯先樹江湖獨轉蓬
凋零驚母黨涕淚落秋風

趙表姪出先德彥章詩卷

晚路嗟流落長時任鬱陶
故人今地下新句出兒曹
野潤春風早霜清夜月高
杯盤舊行樂江水日滔滔

和陳澤民見寄

涉世真堪笑論交愧未忘
先生已高遁賤子尚他鄉
簿領三年夢塵沙兩鬢霜
扁舟歸未得春水滿橫塘

逗曉

逗曉復籃輿平田細路迂村墟元闌寂籬落更蕭疎吠
犬行隨客癡童喚覩渠從來喜淳朴况復野人居

海上

江濶渾無際潮平更不流魚龍方鼓躍鳬鴨共沉浮別
岸多雲樹斜陽一釣舟蓬萊如可到當與子同遊

和左經臣移居

暑往衣仍葛秋來甌尚塵北宮尤養勇東郭故安貧去
國經時久臨江卜築新未能供祿米愧爾少陵人

五言排律

王義夫召飯鰲山亭詩

海上聞三島人間占幾州
孤城臨鳥道雄構壓鰲頭
縹緲層軒外縈紆一徑幽
鳴琴常有暇飛蓋許同遊
平野連天濶洪河遶塞流
清風驅酷暑畏日得新秋
麥破銀絲淨茶烹玉藥浮
官聯慙蹇淺恩紀獨綢繆
牢落登高賦驅馳為食謀
從公時晤語不復歎淹留

寄劉元禮

東郡趨鋒召西廡振羽儀微言元自得夫子更誰師文
物今為盛賢能衆不遺秋風看鵬鷃碧海盡蛟螭妙選
追前輩高標照一時綵衣供戲樂絳帳欲歸遲念昔羣
居盛論文非我私艱難良自信出處不無疑騏驥方千
里鷦鷯但一枝田園日牢落浩蕩故山期

欽定四庫全書

橫塘集卷四

宋 許景衡 撰

七言律詩

平沙閣呈陳古田

畫棟朱欄壓水涯
稍看劍石欲平沙
虹梁突兀幾千尺
雲屋峻嶒一萬家
袞袞公侯應日起
紛紛桃李競春華
雙鳬自合朝天去
饒與銀河八月槎

送董公權入洛

蹉過名園百五期眼前穀雨未為遲好麾席上鐵如意
拚醉花前金屈卮塵土毋辭久行役簿書何計得追隨
河南耆舊俱冥冥試問如今更有誰

獻王祠

有釣魚臺

列國提封倚樂亭九河分處見孤城池臺釣罷人何在
邱壠春來草自生遺像丹青皆舊物斯民簫鼓漫新聲
誰能特表平生事祝史從官得幣牲

寄新茶王聖時蒙示五詩

建溪初採雪芽香病客分來敢獨嘗一盃聊為金粟供
五篇不學玉川狂風雷有信猶嫌晚草木無情也著忙
誰似山中老松栢不知人世有炎涼

贈夏倅

九華直上參雲漢秀氣由來出縉紳聞道賢良歸盛族
故應文彩繼前塵春風醴酒年年好月色燈花處處新
他日傳柑向雙闕還思曾醉慎江濱

和左與言

貧病年來謝還往交親書問可相聞如何舊好懷天末
猶及新詩寄海濱吾子叔孫盡咸籍主人兄弟亦機雲
羣居猶有游從樂官况淒涼獨廣文

和酬張敏叔

東嘉七箸琢紅玉北苑研芽模紫金野人何知敢持餉
詩老發興為高吟松江蓴鱸有家世吳宮風月無古今
飯稻煮茗窮勝覽紛紛市朝塵土深

再和張敏叔

留連五斗未投閒，獨坐窮愁有萬般。
多謝題詩相慰藉，應憐涉世最艱難。
戴聞諸老推工部，何止神童說長官。
我亦半生收好句，夜光偏照篋中寒。

再和敏叔二首

弱冠曾攀桂一枝，半生為國理棼絲。
高吟直到古人處，勇退宜為世俗師。
杖屨訪僧長過晚，茶瓜留客固應遲。
黃山遊舊今能幾，詩社猶忻小子隨。

固知島可是詩奴，何況區區杜與吳。
舉世徒能循覆轍，

先生今為翦繁蕪
淵明松菊還堪賦
白傅園池亦有圖
莫把五湖都占了
也須留與故人俱

和董適道

十載江湖早得名
未饒淮海獨孫登
揮毫落紙才無敵
傾蓋論交喜不勝
休問喧嘩多燕雀
須知變化有鯢鵬
青雲步步前頭去
却莫低飛似我能

和張子壽二首

紅紫紛紛盡鬪妍
遊蜂舞蝶亦翩翩
一年祇是愁閒事

三月過來幾醉眠
生怕楊花飛似雪
忽驚荷葉大如錢
詩人只解尋佳句
分付春愁與少年

風雨朝來不甚顛
殘花贏得更留連
簾櫳寂寂鶯方乳
桑柘陰陰蠶欲眠
老杜只將詩作伴
孝先偏與睡相便
江湖潏潏皆春水
好在橫塘舊釣船

改葬西山延仲主簿特賜慶什次韻

改卜西山痛更深
新塋松柏未成林
三牲不待平時養
再命何勝永慕心
泉壤多應增喜氣
隴雲還為結愁陰

褒稱重辱新詩句拜德渾如旱歲霖

三月十九日同亨仲按樂大晟

聞道鶯花滿上林尋芳誰更畏霖霖鳴鳩乳燕春欲晚
去馬來牛泥自深出火星壇方肇祀聯鑣樂府按新音
溶溶九陌皆流水撩動平生江海心

辰火舊無
祭今創舉

除夕別仲煥

並轡不嫌車馬塵肯教節物惱行人殘年氣候消磨盡
來日風光陡覺新我已襄陽訪耆舊君方郢國和陽春

雖然不作多時別懷古知誰意氣親

和唐知府宗博

學省當年假佩紳誰知家世有功臣朝班長憶傾鵷鷺
海角俱欣識鳳麟坐撫斯民雖有道細看此境本無塵
自憐老馬猶迷路邂逅何妨一問津

了無聲價繼三豪敢嘆崎嶇世路勞綸閣文書慚潤色
琳宮香火想君蒿鯢鵬變化誰能料燕雀飛翻自不高
松竹雖無三徑在長歌歸去也如陶

再用前韻

得賢一語可書紳妙選由來屬世臣
千里方能辨駑驥四靈安可後龜麟
共看再造恢王業肯使中原雜戰塵
聞有皇都近消息眉間喜氣已津津

異禮多應得雋豪病夫深愧館人勞
初欣秩秩陪賓席却憶呦呦賦野蒿
春草池塘還得句霜天雕鶚定飛高
也知野客多閒散丹竈松風獨訪陶

寄家兄

斗祿驅馳驚歲晚世塗齟齬奈時何也知犬馬猶能養
自恨田園苦不多兒女近來渾長浪弟兄何事尚奔波
橫塘卜築今應好試為頻頻理釣蓑

會餘慶

山城動是三年別古寺今陪半日間簿領嗟余多眊矂
道塗憐子亦間關並遊天上皆英俊幾箇江邊肯往還
莫惜一尊相伴醉已將毛髮等丘山

休師惠詩次韻

也知寸木可高岑肯負平生學古心王事曾無絲粟補
鬢毛已覺雪霜侵寓留古寺聊登覽喜有高僧與對吟
更憶仙山最深處巖前小雨弄晴陰

贈仁上人

飽聽長蘆江水聲歸看苔雪更分明故人應嘆遽如許
慈母翻愁太瘦生邂逅艤舟同一笑登臨懷古亦多情
驛張好句新拈得恰好而今送子行

敏叔有送僧云別後遙知倚門母老

來偏憶
出家兒

宿靈峯贈總持大師

記得曾為鳳林客
高僧住處最深幽
幾千里外重攜手
三十年間一轉頭
霜葉乍驚風撼撼
雲堂相對夜悠悠
去留聚散元無著
自笑多情更刻舟

寄康師

好在仙巖康上人
從來心事許誰親
品題泉石詩無敵
吞吐煙霞筆有神
聞道弟兄皆妙質
要當談笑繼前塵
箇中況有東溪老
行處何妨更問津

寄仙巖元上人

龍穴梅潭抱嶺斜
憶曾同試雨前茶
稍須林壑開雲葉
便倩兒童汲井花
一別仙山空夢寐
五年邊塞走塵沙
會須覓片閒田地
鄰舍如儂有幾家

送持後過越

永嘉竹閣談空相
自是僧中第一流
盡放衲僧來聽講
也容禪子不相謀
二林三峽曾經耳
萬壑千巖試舉頭
提取淨瓶涓滴許
有時散作五湖秋

聰師邀入山

學道無成亦可憐
紛紛膏火自熬煎
似聞沽酒邀元亮
故敢移書問大顛
州縣徒勞輸此日
雲山高卧或他年
須知二老風流在
賞遍西枝月更圓

虞仲訪僧正見招以詩屬亟歸不及往依韻和
報兼簡康休二上人

東溪自是老林師
千偈瀾翻獨此時
盡判百家無好句
故教二子亦能詩
逢迎蠟屐應班草
奔走芒屨愧采芝

多謝相招故人意更慚妙韻繼前思

題舒氏覽秀樓詩

遶屋青山羅髻鬟小樓幽勝可躋攀
不論空翠煙霏處盡在軒窗几研間
眼淨更無黃土眯身輕仍伴白雲閒
他年定作還鄉計儻與親朋一扣關

戴夫人挽詞

詩書歷歷教鄉鄰甘旨熙熙八十春
盡道先生真孝子故知賢行屬夫人
總惟一訣三年後栢壠孤墳數尺新

翦綵種萱今已矣多應處處有遺塵

傅夫人陳氏挽詞

婉婉名家早結褵伯鸞初怪嫁時衣半生已覺人間夢
九死猶知俗習非日永春風漾蘋藻夜寒霜月落庭闈
稽山會葬人歸後千古蒼官守翠微

柯運判修試院

當年龍閣帥閩中闕館興賢特地雄還見芝蘭修世職
固知斧藻有家風堂堂劔佩瞻遺像袞袞簪紳出泮宮

勸學一門真盛事西州何獨美文翁

寄台守劉襲明都講二首

江入章安波浪寒仙山縹緲在江干二千石是誰為守
三十年前好長官聞道漁樵安里社從教風月落杯盤
新詩別後知多少更借鄰翁洗眼看

薰然和氣破春寒見說專城冠越干訟牒不勞揮翰手
歡謠好付採詩官獨慙聖世人三黜誰怕仙山路九盤
但得白頭長健在莫辭青眼重相看

送連子友守淮安二首

古來江漢最風流，何況分符得顯州。
落日淮源香泛泛，含春沁水綠悠悠。
兩岐定有豐年瑞，五袴行間載路謳。
大觀督郵誰見憶，蕭蕭華髮對滄洲。

憶昨銀袍試廣庭，桂科同日拜恩榮。
幾千里外相逢處，三十年間一夢驚。
隼旂光華仍遠別，豸冠流落獨含情。
清淮東下饒雙鯉，江海何妨數寄聲。

送何亨老出守泰州

海陵人說毘陵好太守當年迴不羣
新命而今分竹去歡謠何似隔江聞
簿書幕下人誰任尊俎樓頭客自醺
千騎固應知體國古來畎畝不忘君

張敏叔守梓州

風月關心自不閑詩家本領更多般
千篇要繼杜陵後萬里寧辭蜀道難
今日赤帷新刺史幾年錦帳舊郎官
莫嫌白首功名晚松柏從來耐歲寒

護國寺詩

未暇遠尋廬阜遊只消護國也深幽種蓮惠遠誰還往
得酒淵明自獻酬惡句多慙居唱首高吟長許作遨頭
請看十八人同社盡是人間第一流

小詩聊記鳳山遊髣髴東林水石幽已愧高僧與摹刻
更煩諸老數賡酬簿書底事長遮眼林壑何人肯轉頭
會待從公白蓮社杖藜來往亦風流

次韻馮吉老

馬蹄長厭軟紅塵欲去虛名意亦欣壯士寧為東閣客

故人休誦北山文到家留語應如鶴出岫無心恐似雲
我亦有田江海曲年來舍已為誰耘

次韻盧彥升

同場名輩敢爭鋒想見當年賦詠工
冉冉星霜今欲老拳拳畎畝獨懷忠
羊腸已失千重險鵬翼方看萬里風
應笑長安徒粟米不知鼯鼠技將窮

次韻陳李修

綵衣初寄水邊村學子紛紛已滿門
聞道詩書多肯趣

固知師友有淵源聲名在子那能掩志業如余豈足論
應笑倦飛歸已晚結廬開徑近雲根

次韻經臣見贈

邊陲無故事喧爭惆悵中原失太平天上風霜方鼓動
人間草木已欣榮共懷前日千齡遇誰使蒙塵萬里行
淚眼時時望滄海百川渺渺嚮東傾

過敏叔次韻

花縣曾聯令宰裾神都今喜沒階趨青雲羽翼看一鶚

秋水精神識二鷄歷覽何如少陵集新詩便是梓州圖
狂吟大膽誰知我敢向龍門捋虎須

是日見東川唱和
景物皆少陵陳迹

和趙承之春日

土牛喚起打春人休向東郊更探春未說風光十分好
且看節物一番新田園自省非無意簿領誰知尚為貧
開塞塵沙長滿眼橫塘水破碧鱗鱗

寄內

離家不道多時別在路俄驚兩月闌漫有傳筒將委曲

祇容書歷報平安文園雖得相從樂明月長思一處看
早晚征鞍過天姥寄聲草草具杯盤

橫山閣

一笑樓頭屬晚晴我曹此樂最難名玉樽浮蟻一樣白
青眼與山相對橫箇裏風流終古在世間榮利過雲輕
未應暮色催歸思天外娟娟新月生

趙虞仲過過仙巖以詩見寄答之

十年歸夢在江湖今日南飛塞鴈孤已覺登臨多感慨

固應吟詠轉荒蕪近聞仙嶺尋先友亦有詩筒及老夫
還許追隨白蓮社橫塘今已結茅廬

借韻

焚香藍帳中酷似梅花

江南臘雪不到地六出枝頭也逼真萬里塞垣從簿領
五年驛使絕音塵誰知斗帳回殘夢却有鑪煙作早春
草木無情聊假合謝他知有箇中人

次韻戴禹功父子遊靈隱

聞道飛來太怪生薄遊聊與問山名陀羅布影於中好

駕耨飄香分外清猿在僧呼雖舊事鶴鳴子和亦真情

晚來歸路還瀟灑裊裊青煙十里城

伽陀羅木間有至中國者

再和戴堯卿遊靈隱

雲房相與話浮生此樂須知未易名釋子命題良有自
老人琢句得能清倚天樓殿三吳勝落日湖山萬古情
詩社若容追故事未饒五字有長城

甲辰春作

香火祠庭即隱淪誰知未許作閒人一拋夜雨橫塘宿

三見東風石液春
當寧照臨齊日月
餘生報効絕涓塵
尚寬九死憐多病
乞與江湖自在身

和胡繼道傷春

遊車輾輾不停輪
紅日遲遲展得春
莫問年光催老速
且看風月逐時新
田園未信無來客
雲水從今願卜隣
預想漁村往還處
野航何止兩三人

上時相壽五首

閒看暖律幾時回
已覺陰雲四面開
萬物定知春色近

三台今引歲星來競拈彩筆題詩句端為蒼生祝壽杯
師保從來周召事直須兩兩位公槐

年年燕喜倍光榮蘭玉稱觴滿相庭信宿尚餘元夜月
上台却是老人星包荒度量侔河嶽盖世功名在典刑
一語堪為我公壽聖賢相與合千齡

清淨端為物外仙經綸猶有世間緣坐令四海渾無事
付與羣生大有年南極老人今日見西樓明月夜來圓
吾君萬壽公同德綠髮朱顏照冕蟬

槐庭三入妙經綸百度分明又一新上欲無為成至治
天教難老為斯民川塗蕩蕩初消凍草木欣欣各自春
誰信塵埃尚羈旅四年企首望洪鈞

上帝分明憫下民挺生賢傑在斯辰蓮華葉上青髯老
萱草堂前艷藥春盡閱摺紳歸藻鑑頻教動植入陶鈞
古來多少調羹手獨見緇衣有世臣

寄敏叔寺簿詩

海角紛紜祇簿書竭來不覺一年餘自嗟擾擾無休息

猶及匆匆問起居前日先生官獨冷而今主簿意何如
應憐小女猶癡在只喜腰間已佩魚

敏叔時為太常簿新改服色

賀生日詩

慶系來從沁水園勲門婦德衆稱難舊聞孟母無欺語
新得嫦娥不老丹行見綵衣添袞繡更饒文砌擁芝蘭
却須剩種黃金菊留待年年獻壽看

德起惠酒

橫塘今作小塘居齋几蕭然一卷書心事蹉跎嗟老矣

天涯流落念歸歟尚煩親好頻攜酒多謝園人日餉蔬
此境從來無遠近祇應在處是吾廬

韋尉畫孫倅寶冠山圖

問著蠟屐到何處直在寶冠山上頭碧澗坐來元洒落
彩毫畫得便風流公方得志人間世我亦長思物外遊
一幅須尋好東絹閒人亭畔倩韋侯

送仲煥入潁詩

好箇石城無分到問君此去意如何一江春水竹葉酒

萬點青山佛髻螺聞道楚宮俱泯滅祇應郢邑亦疑訛
直須索取圖經看莫只聽他白雪歌

送西京宗博林茂南赴烏程

才名自昔等三張閱駿無人似九方金谷園中辭綺席
水晶宮裏奏清商割雞正好師言偃歌鳳多應笑楚狂
未信江湖留得住凌雲頭角老昂藏

敏叔浮梁詩有放教明月上扁舟之句因成小
詩

幾年浪作紅塵客，明月扁舟不自隨。
忽得浮梁好詩句，却思望柱舊家時。
煙蓑雨笠多應在，利逕名場兩不知。
會有功成身退日，不煩猿鶴怨歸遲。

望柱在橫塘之側，亦地名也。

與言叙己卯之別

放逐歸來梅子真，江邊無限送行人。
千鍾桑落開新釀，十里梅花正早春。
邂逅喜君方筮仕，經過嗟我倍思親。
驚回十二年前夢，陳迹依然淚滿巾。

兄長省試下第還鄉，以不及願拊景衡于此情。

見于詩謹次韻

江邊送我赴瀛洲風物蕭蕭又見秋
百歲能禁幾回別此生已是十年愁
塞鴻自覺東南遠汴水誰教日夜流
淚濕西風知有寄塵沙漠漠漫回頭

送剛巽還鄉

問君謁告還鄉曲來往塗程得幾時
莫怪杯盤能草草只緣行李弗遲遲
路從鴈蕩靈山好秋入鵠原草樹衰
京國艱難同旅食而今莫遣老人知

剛巽舊與兄包蒙
同在京師今剛巽

歸為其
葬耳

次韻戴禹功游淨梵退居

泮宮人物最清修杖履時尋水石幽已聽老僧談出處
更邀逐客共賡酬浮雲過眼空千古巨浸觀身祇一漚
風彼舞雩宜有得聖門更欲與公游

天寧節上壽紫宸退詣相國寺祝壽宴尚書省
霜天宮闕九門開共獻君王萬壽杯善祝歛來傾寶剎
賜筵還許燕中臺樂連百戲鴛鴦集花覆千官錦繡堆

說與伶倫逢此日年年長賦醉蓬萊

和陳文仲嘲夢

文仲已罷科舉
忽夢預秋薦

天公真箇解撩人不獨虛名老搢紳聞道高眠閒白日
也教幽夢落紅塵此生出處元無意平日文章漫有神
百歲都來如一覺却須嘲取自由身

乙巳八月二十九日宿內府夢過村落循溪而
行問路旁人家此云何曰士村也涉溪入山崦
謂同行曰此可賦詩因得鴛燕二句既覺足之

以為異日之觀

杖策徐行山水間天然新句得非難
鳴鳩報雨天欲曉紫燕哺雛春尚寒
物外勝遊方自適枕邊幽夢忽驚殘
士村他日尋陳迹却記曾為內府官

紀夢詩郭荀卿見和次韻

溪水泠泠溪上軒登臨誰道四并難
當年髣髴夢仙塢今日分明在廣寒
還憶鳩鳴雲色重似聞鷄唱漏聲殘
刻舟已有新詩句流落何妨作外官

秋冬思家

鈎簾危坐思悠悠
踈雨知人特地收
明月清風孤館夜
寒砧短笛異鄉秋
我生志氣誰相許
何日身心得自由
極目長天山隔斷
吾家不見白雲浮



